

27 JUL 1999

LID-RAKAN KONGSI

LID BELUM SEDIA PELAWA NEGARA MAJU SBG RAKAN KONGSI

LANGKAWI, 27 Julai (Bernama) -- Dialog Antarabangsa Langkawi (LID) belum bersedia untuk memasukkan negara-negara maju sebagai rakan dialog mereka ketika ini, kata Perdana Menteri Datuk Seri Dr Mahathir Mohamad, hari ini.

"Jika kita mengambil negara-negara maju sebagai rakan kongsi, terdapat kecenderungan bagi mereka untuk menguasai sesuatu perkara. Oleh itu kita tidak begitu berminat untuk memasukkan mereka ke dalam dialog antarabangsa ini," katanya.

Keadaan sekarang adalah baik, katanya kepada sidang akhbar LID '99, hari ini.

Presiden Joaquim Alberto Chissano dari Mozambique menambah: "Di Afrika, kami mempunyai sedikit perkara untuk dianggap pintar oleh negara-negara maju, sehingga kami mencapai ke tahap mereka kelak barulah kita mempelawa mereka."

Presiden Festus Gontebanye Mogae dari Botswana, berkata dialog itu harus memasukkan semua pihak pada suatu masa kelak.

Dialog di Langkawi ini adalah LID keempat sejak dialog pertama diadakan pada 1995.

Rakan kongsi dialog dikembangkan dengan memasukkan perwakilan daripada sektor perniagaan dari negara membangun dan maju.

Pemimpin-pemimpin hari ini membuat kejutan ketika sidang akhbar dengan menanyakan soalan kepada wakil media -- sama seperti yang berlaku dalam sidang akhbar yang diadakan pada Ahad lepas.

Tetapi kali ini, wakil media -- tempatan dan asing -- dibenarkan menanyakan soalan.

Kumpulan Wanita Pertama juga menyertai dalam sidang akhbar pada kali ini.

Panel media termasuklah ketua pengarang kumpulan New Straits Times Press Datuk Kadir Jasin, Pengarang Kembara NSTP, Hardev Kaur, timbalan ketua pengarang kumpulan Utusan Malaysia, Sirajuddin Rafia, pengarang bahagian perniagaan The Star, Wong Sulong dan pengarang kumpulan NST Ahmad A. Talib.

-- BERNAMA

JM ZK MA